

1 Ogos 2006 (Selasa)
Berita Sarawak

Ketua Audit Negara Beri Beberapa Garis Panduan Menjayakan RMK-9

KUCHING, 1 Ogos (Bernama) -- Ketua Audit Negara Tan Sri Ambrin Buang hari Selasa menggariskan beberapa garis panduan untuk memastikan pelaksanaan projek pembangunan di bawah Rancangan Malaysia Kesembilan (RMK-9) mencapai matlamat.

Beliau berkata pelaksanaan projek kerajaan untuk rakyat harus dipantau dengan rapi dan keupayaan pelaksanaannya ditingkatkan untuk mengelak projek lambat siap atau terbengkalai yang seterusnya akan meningkatkan kos pelaksanaan.

Katanya, semua jabatan dan agensi harus memastikan projek-projek RMK-9 memanfaatkan kumpulan sasaran dan tidak menjadi projek gajah putih yang akan menimbulkan ketidakpuasan hati rakyat terhadap kerajaan.

Budaya penyelenggaraan juga harus disemai untuk memastikan projek yang siap kelak diselenggara dengan baik dan digunakan sepenuhnya bagi memenuhi tujuan ia dibangunkan, katanya.

"Kerajaan pusat dan negeri akan membelanjakan berbilion-bilion ringgit untuk menjalankan projek-projek pembangunan RMK-9. Maka saya berharap semua jabatan dan agensi menjadikan garis panduan itu untuk menentukan matlamat RMK-9 berjaya tercapai," katanya di majlis penyampaian sijil penyertaan Anak Angkat Jabatan Audit Negara Cawangan Sarawak di sini hari ini.

-- BERNAMA